

Itilliarsoop ikerasaliorfigineqarnissaa piviusunnngorteqqullugu Naalakkersuisut suliamik aallartitseqqullugit peqquneqarnissaannik Inatsisartut aalajangiiffigisassaattut siunnersuut. Ikerasaliaq Nordstar 30-imit assigisaanilluunniit aqputigineqarsinnaasunnngorlugu isissusilerneqarlunilu silissusilerneqassaaq.
(Inatsisartuni ilaasorta, Anders Olsen, Siumut)

Akissuteqaat

(Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneqarnera

Aallarniutigalugu periarfissaq manna iluatsillugu aalajangiiffigisassatut siunnersuummut matumunnga, Umiarsualiviit pillugit Nassuiaatip, 2019-imi Inatsisartunut agguanneqartup misissorluarneqarsimaneranik tunngaveqartumut qujavunga.

Imaatigut angallaneq inuunitsinnut ilaalluinnartuuvoq. Imaatigut attaveqaatit inuiaqatigiit ataqtigiinnitsinnut pingaaruteqartorujussuupput. Sumiiffinni naleqquttuni pilersaarusiamik ikerasaliornikkut, innuttaasut nunat iluisigut umiatsianik angalanissamut periarfissaqalissapput, isumannaassusaallu pitsaanerulersinnaallutik.

Kisiannili immami attaveqaatit ikerasaliaannaangillat. Assersuutigalugu aamma naaralaartitsiviit, imarsiortunut nalunaaqutsiussat minnerunngitsumillu umiarsualiviit pigineqarput. Naluneqanngitsutut ataatsimiinnermi matumani Namminersorlutik Oqartussat umiarsualiviutaasa aserfallatsaaliorneqannginneri pillugu nalunaarussiaq agguanneqarpoq.

Namminersorlutik Oqartussat umiarsualiviutaanni kinguaattoorutit annertusiartorput, aammalu maanna 270 mio. koruuninik naleqarlutik. Naalakkersuisut naliliipput, maanna pissutsit ima pinartigilersimasut, allaat aningaasaliisoqanngipput ukiut qulit tulliuuttut ingerlanerini isumannaallisaaneq eqqarsaatigalugu nunatsinni umiarsualivinnik ulappuffiunerpaanik pingaarnerpaanillu matusisoqartariaqalissalluni. Maanna iliuseqartoqartariaqarpoq.

Isumannaallisaaneq patsisaalluni assersuutigalugu Aasianni Maniitsumilu umiarsualiviit matoratarsinnaanerit Naalakkersuisut akuersaarsinnaangilaat. Taamaattumik ataatsimoorussamik umiarsualiviutitta iluarsartuunneqarnissaannut, aserfallatsaaliqarnissaannullu aningaasaliissutaasariaqartut aqputissiuunneqarnissaat pingaartitorujussuupput. Tamanna 60 millioner koruunit pallillugit akeqartussamik Itilliarsummi ikerasaliornissamut ajoraluartumik naapertuutinnngilaq. Taamaattumik kommunit peqatigalugit nassuiaat pillugu eqqartueqatigiinnissamut Naalakkersuisut aggersaaniarput, tassanilu ilaatigut pilersaarutit tullerriaarneqarnissaat aningaasaleeriaatsinullu tunngasut eqqartussallutigit.

Naalakkersuisut ikerasaliornissamut aningaasartuutissat maannamut siulliunneqarnissaat isumaqatigisinnaangilaat. Taamaakkaluartoq Itilliarsummi ikerasaliornikkut imaatigut angallannerup isumannaannerulernissaanik siunnersuuteqartup isumaatut Naalakkersuisut isumaqarput. Imaatigulli attaveqaqatigiinnermut pioreersumut akisussaassusermik takutitsinissaq piffissanngortoq. Ajornartorsiut massakkut iliuuseqarfigineqanngikkuni ajorsartuinnartussap iliuuseqarfiginissaa piffissanngortoq.

Isumannaallisaaneq patsisaalluni umiarsualiviutitta matuneqannginnissaat qulakkeerneqareerpat, nutaanullu aningaasaliissuteqaqqilernissaq piffissanngorpat ikerasaliassat aallartiffissaqqippat. Tamanna pitinnagu akikinnerusumik imaatigut angallannermi sutigut isumannaallisaanikkut pitsanngorsaasoqarsinnaassanersoq Naalakkersuisut misissussavaat. Imaatigut isumannaallisaaneq naalagaaffiup suli akisussaaffigimmagu, Itilliarsuup nalaani ikerasaliornissamut periarfissaagallartumik imaatigut isumannaallisaanermut pitsanngorsaataasinnaallutik suliniutaasinnaasut pillugit, naalagaaffeqatigiinnermi oqartussaasut Naalakkersuisut oqaloqatigissavaat.

Tamanna tunngavigalugu siunnersuummi matumani matuma siuliani saqqummiunneqartut itigartinneqassasut inassutigineqarpoq.